

Friday, June 20, 2025

Time - 2:30pm

INDIAN ROADS CONGRESS

Chief Minister Pu Lalduhoma'n Mizorama kawng bit zawng chu square km khatah km 46.37 a nih thu leh hei hi ram pum huapa chawhrual km 166 aini a hniam hle thu a sawi.

Ni hnih awh tur India ram chhunga kawngpui siam dan tur tehfung pawimawh hrang hrang duangtu Indian Road Congress Mid Term Council Meeting vawi 233-na Mizoram University Auditorium, Aizawla nghah a hmanpuinaah he thu hi sawiin Chief Minister chuan Mizoram National Highway atan leilung leh ruah tui tlak tam ngaihtuahin cement concrete kawng, rigid pavement chu Mizoramin a mamawh thu a sawi a. Central Road Fund atangin cheng vbc 300 tal tun tangka kum kal mek atan hian a beisei thu a sawi a. Mizoram chu Myanmar leh Bangladesh nena inri a nih avang leh Act East Policy atana tangkai tak a nih avangin Mizoram kawng chu ngaih pawimawh bik a tul thu leh kawngpui atana sum lo kal turah pawh ngaihpawimawh hmasak a hlawh tir phah dawn thu a sawi.

He huna khualzahawm Union Minister of State for Ministry of Road, Transport & Highways Pu Harsh Malhotra pawhin thu sawiin Mizoram kawngpui siam danah cement concrete-a siam kawng, rigid pavement chu to zawk leh hun duh rei zawk ni mah se a that ber dawn thu a sawi a. Mizorama kawngpui siamdan phung chu rigid pavement-a siam zel a nih tawh tur thu a sawi a ni.

PWD Minister Pu Vanlalhlana pawhin thu sawiin vawiin IRC Council chuan hmarchhaka kawngpui siam harsa leh danglam bik tak chungchang pawh uluk taka a ngaihtuah a beisei thu a sawi a. Hmarchhak ram leilung chuan ngaihsak bik a mamawh hle tih sawiin hmarchhak kawngpui atan chuan rigid pavement-a siam kawngpui a that ber thu a sawi baw a ni. Indian Roads Congress hi highway engineer leh kawngpui siam lama professional hrang hrangte intelkhawm pawl niin kawngpui siam, lei dawh leh kawngpui hmanga inkalpawh chungchanga dan leh tehfung zawm tur hrang hrang - Indian Standards, Code, Manual leh adangte an duang thin a. Council meeting mai bakah, annual session, international seminar leh workshop hrang hrangte an buatsaih thin a. Tun tuma Mizoramin a thlen Mid Term Council Meeting-ah hian IRC Publication thar 5 tlangzarh a ni.



NASHA MUKH BHARAT ABHIYAN

Rampum huapa ruihhlo do beihpui thlakna Nasha Mukh Bharat Abhiyan pualin Lunglei District ah ruihhlo thatlohzia inzirtirna hun hman a ni. Lunglei District Social Welfare Officer Pu CL Joseph chuan zirna in hrang hrang leh Kohhranah campaign thin ani tih sawiin hengah hian mi thlan bik ten zirtirna an pe thin a ti a, International day Against Drugs abuse and Illicit Trafficking pualin Lungleiah sikul naupang tan intihsiakna hrang hrang a awm dawn tih sawiin zingkarah Walkathon buatsaih ani dawn a ti a, ruihhlo thatlohzia uar taka inzirtir ani dawn tih a sawi. Lunglei-a Chanchibu Editor Pu K. Lalrinpuia chuan a chanchinbu enkawl Vulmawi chanchibu kaltlangin Ruihhlo that loh zia an puanzar reng thu a sawi a, ruihhlo chu tih takzeta do a ngai tih sawiin theihtawp chhuaha mipuiin sawrkar an thlawp a ngaih thu a sawi baw.



LOKAYUKTA AWARENESS

Kolasib-a Lokayukta Awareness ah Mizoram chu India rama eirukna (Corruption) tlemna ber pahnihna a nih thu tarlan a ni.

He thu hi Kolasib-a Lokayukta chungchang mipui hrilhhriatna June ni 18-a buatsaih ah Lokayukta Member Pu Joel Joseph Denga chuan a sawi a, Mizoram chu ramchhunga eiruk tlemna ber pahnihna ani tih sawiin document leh record a tarlan kher loh Mizoramah eirukna lamah fihlim lohna tamtak inphum ru a awm thung tih a sawi.

Pu Joseph Denga chuan Corruption chu mihring ze nghet lo leh anmahni chhungril a intan a ni tiin, corruption do tur chuan mitin insiamthat hmasak a pawimawh a ti a, Sawrkar in hmasawwna ruhrel tur atana hnathawhna tur pawisa tamtak a sanction thin chu a nihna tur diktak a hman tur ani tih sawiin Mizoram hmasawwna tamtak ti thuanawp tu chu duhamna a nih thin thu sawiin, pass diklo pekchhuah te, contract a nihna ang tur taka thawh loh te, sawrkar sum leh bungrua hman khawlohte a hluar thin chu pawl a tih thu sawiin, corrupt anni tih pawh inhriat tawhloh a, ngaia neih khawpa corruption a awm thei tih a sawi baw.



CYMA

Central YMA Kumpulan Committee leh Mizoram Police ten Dan loa sumdawng an dap. CYMA Kumpulan committee leh Mizoram Police tangkawp hian Aizawl khawchhung hmun thenkhatah, Hnamdang danlo a sumdawngte dapchhuakin he hunah hian ILP fello enfiah niin a fel lo chu thu neitu te kutah hlan an ni a. CYMA Vice President leh Kumpulan Chairman Prof. Lalnuntluanga chuan danlo a sumdawng Mizo hming hawh tir an awm thin thu leh Mizo mipuite tanrual a pawimawh thu sawiin Dan leh thupek kengkawhtute, Police te thawh pui thiama tan rual a tul tak zet thu a ti a , a tul ang zela thuneitu te nen dan lo a sumdawngte endik chhun zawm an tum thu sawiin ram leh hnam himna atan Mizo mipuite tanrual a tul thu a sawi baw.



AIR HOSTESS LAID TO REST

Ahmedabad-a Air India thlawhna tlaa Cabin Crew thi Manipur state mi Zohnahthlak nula Lamnunthem Singson ruang chu wawin khan a chenna Kangpokpi, Manipur ah vui liam a ni.

Lamnunthem Singson ruang hi nimin chawhnu khan Dimapur thlen pui a ni a, mi thahnem takin ruang an lo hmuak a, Ruang lo hmuahna hunah hian Nagaland sorkar aiawhin Dimapur DC le Dimapur Commissioner of Police te chuan a ruang chungah puan a lo dah a, a ruang hi Dimapur atanga Manipur Kangpokpi panin nizan dar 9:30 velah a chenna thlen pui a ni.

Lamnunthem Singson ruang hi wawin khan a chenna Kangpokpi ah vuina hun buatsaih a ni a, mi thahnem tak kalin mi tam takin an ui zia an lantir a ni. Air India thlawhna hi June 12 khan London pan tura Ahmedabad airport atanga a thlawhchhuah hnu reiloteah a tla a, hetah hian a chhunga chuang mi 242 zinga 241 an thi a, hei bakah a tlakna hmun BJ Medical College-a lo awm mi tam takin nunna an chan baw a ni.

